



Händel Messias já juovlah 2024

Ohtâ ristâkode stuárrámuin juuhlijn, juovlah, lii vuod aldanmin. Mij ráhtip juhle jieškote-uv vuovijguin jieččân paaihijn, jieččân perrui ärbivuovij vuáđuld. Siämmáá ääigi juovlâi kulij jođedijn lii savâstállum ristâlii osko oinuumist ohtsâškodeest.

Uđđasumos savâstálmist láá sárnum ovdâmerkkân tast, ete puáhtá-uv škovlâláid oovdânpyehtid baarookmuusik cimccâh, G. F. Händel Messias-oratorio. Taan eromâš fiijnâ tyeje oskoldâhlij čuujootmij tiet ohtâ maadâsyemmilâš škovlâ keesij maasâd oovdânpyehtim, vâi iä vahâgist luávkkááččii oovtâgin uáppee oskoldâh- já uámitobdorijjâvuodâ.

Tego máttááttâsminister Anders Adlercreutz-uv lii pahudâm, te syemmilii kulttuur madduuh láá jienjâlsâst ristâlâšvuodâst. Oskoldâhliih čuujootmeh já ristâosko pyehtim ärbivievih láá jyehi kuávlust mii pirrá, ain ohopeeivijn vuoinâstempeivijguin, ägilovvoost, kirjekielâst já ain ovdâskulij syemmilii škovlâlâjádâsâst já pyereestvaijeemohtsâškodeest. Mii eennâm ristâlii já luuteerlii ärbivievist lii jieijâs tehâlâš rooli tast, ete tagareh áárvuh tego luáttámuš, iäljárvuotâ, rehelâšvuotâ já ovtâskâs ulmuu árvu ain kovvejeh mii ohtsâškode. Listo puáhtá juátkid aalmugijkoskâsávt-uv vala OA olmošvuoigâdvuotâsopâmuššâid já EU vuáđukirjijd. Ristâlijd jiešvuodâid ij lah máhđulâš sikkod mii pirrásist.

Puáris eđâldâh iätá joba tienuvt, ete oskoldâh lii kulttuur váimu, já kulttuur oskolduv háämi. Kulttuurist ko kulttuurist láá ain motomeh teháliih áárvuh stivriimin ulmui koskâsii toimâm, já tai epidem já tuástum čuávumušah láá táválávt lamaš traagisiih. Ohtâ várutteijee ovdâmerkkâ lii Sovjetlito historjá.

Tiädust-uv kihheen ij koolgâ jieijâs vuáđu-uáinu vuástásávt hárvuttid Suomâst oskolduv, mutâ viggâmušah sikkod, hygienisistid ohtsâškode oskolduvâst jođetteh kulttuur kulnâmân. Mii talle puáđáččij-uv sajan mii epistâđisin šaddee já mangáid vaaigutmaid herkis informaatioääigist?

Händel Messias tuodâi čuujoot Messiasân, Jeesusân, kiän šoddâm mij muštep juovlâi. Taat Messias, Immeel Kandâ Jeesus, šoodâi maailmân olmožin. Návt sun vaaldij ulmuu uási já šoodâi tubdâđ puoh olmošeellim iloid já soroid. Ko maailm lii taan-uv juovlâi 2024 vyelni tievâ soodijn já epivisesvuodâst, lii rávhuiduttee tiettid, ete juovlâi Hiärrá lii toi-uv kooskâst miiguin.

Mun tuáivuttâm Tunjin já tuu aldaulmuid Kristus-pääрни čuovvâm, sivnedum juovlâid.

Oulust advent ääigi älgidijn 2024

Jukka Keskitalo
Oulu pispekode pispe